

Protocol no. 16
Sezzüda da mardi, 24 avrigl 2012 – 20.00 – 23.00

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)
Jon Curdin Felix (tractanda 2 e 3)

Protocol

Il protocol no. 15 da la sezzüda da lündeschdi, 16 avrigl 2012 vain approvà.

101 021 FABRICA
Johannes Bürqi – Müdamaint dal proget intern, Plaz 151

Il patrun da fabrica vulesch müdar il proget inoltrà dal 2011 internamaing da maniera chi nu gniss plü fabrichada üna abitaziun nouva aint il tablà. Il proget vain redimensiunà uschè cha l'abitaziun existenta illa part davant da la chasa gniss be ingrondida per alchüns locals aint in tablà.

Il Cussagl cumünal decida, in assenza dal schef da fabrica sco persuna pertocca dal fabricat, da concenter il permiss pel müdamaint dal proget e cun quai vain concess eir la prolungaziun dal permiss da fabrica dals 30 mai 2011 per ün on implü.

Il cumün incassa üna taxa da trattamaint da fr. 50.--

102 021 FABRICA
Johannes Bürqi – Fabrica da garascha in stalla, Plaz 151

Il patrun da fabrica vulesch fabricar our da la stalla üna garascha culla sortida vers süd (vers la butia da Plaz). Il nivel dal soccal grisch dal mür gniss dozzà sün l'otezza da l'üsche da garascha, uschè cha l'üsche füess intergrà cumplettaing aint il soccal. La larghezza da l'üsche da garascha es 4.95 m.

Il Cussagl cumünal decida, in assenza dal schef da fabrica sco persuna pertocca dal fabricat, da conceder il permiss da fabrica tenor ils plans inoltrats.

Il cumün in chascha üna taxa da trattamaint da fr. 100.--

103 021 FABRICA
Fadri Stricker – Refabricaziun da la remissa, Spinatscha

Il patrun da fabrica fa la dumonda da pudair refabricar la remissa sboudada causa las naiveras. La remissa gniss fabricada al listess lö e cullas listessas masüras sco'l fabricat sboudà. L'acconsentimaint per fabricats dadour la zona da fabrica es avantman.

Il Cussagl cumünal decida da conceder il permiss da fabrica tenor ils plans inoltrats.

Il cumün in chascha üna taxa da trattamaint da fr. 100.--

104 021 FABRICA
T. e B. Schöpfer / R. e S. Werner- Fouras geotermicas, Flüs

Ils patruns da fabrica dumondan da pudair realisar duos fouras geotermicas davant garascha e sün agen terrain. L'acconsentimaint da l'uffizi per natüra ed ambiaint (ANU) es avantman.

Il Cussagl cumünal decida da conceder il permiss tenor la dumonda fatta.

Il cumün in chascha üna taxa da trattamaint da fr. 100.—

105 021

FABRICA

G. Lutz e C. Di Guimaraes de Aquino, Stron 261

In connex cul fabricat a Stron manca amo adüna la documainta necessaria per pudair conceder üna prolungaziun dal permiss da fabrica. In vista cha la prolungaziun previsa vain concessa pels 1. avuost 2011 ed es valabla ün on, ed in vista cha la procedura per conceder la prolungaziun douvra eir seis temp, propuona il schef da fabrica d'avisar als patruns da fabrica cun charta cha la documainta stuveess gnir inoltrada prosmamaing e cha la fabrica haja da gnir iniziada, respectivmaing in quist cas continuada evidaintamaing fin il plü tard als 31 lügl 2012. Il Cussagl cumünal decida d'inviar per l'ultima jada ün avis e cha otramaing nu dessan ils patruns da fabrica da la chasa a Stron plü gnir avisats a regard eventuels termins chi scroudan.

106 021

FABRICA

A. Schmidt - Vaidrina d'affar, fermativa Sala

Anton Schmidt ha inoltrà la dumonda da pudair douvrar la chava aint il mür pro la fermativa da la Posta a Sala per fabricar aint üna vaidrina per metter oura ogets sco recloma per seis affar. Illa discussiun as muossa cha'l lö previs nun es adattà per l'adöver previs. L'uriunt local dals containers es uossa mis ad ir sco local d'aspet ch'id es fingià uossa vaira s-chür uschè chi nu füss d'avantag d'implir eir amo la chava respectivmaing la fanestra cun üna vaidrina chi piglia davent il cler. Da princip vuless il Cussagl cumünal però spordscher man per l'intent e propuona per quai sco lö per la vaidrina l'anteriura cabina da telefon chi as rechatta eir pro la fermativa da Sala. Il Cussagl cumünal decida da comunicar ad Anton Schmidt la motivaziun per na pudair aderir a seis giavüs ch sco eir la proposta alternativa per pudair realisar l'intent.

107 620.501

Vias e piazzas

Dumonda da princip a regard spazzi public per affichas e per reclomas d'affars

I aintran adüna darcheu dumondas scha'l cumün nu pudess spordscher spazzi public per affichas per occurenzas e per reclomas d'affars. Il Cussagl cumünal es da l'avis chi detta singuls lös adattats per laschar metter placats o reclomas d'affars, sco p. ex. aint il suottet da la fermativa da Posta a Sala. Il Cussagl cumünal es da princip da l'avis da vulair spordscher il spazzi. A regard il lö e las cundiziuns vain decis, tuot tenor inoltraziun, da cas a cas.

108 79

PLANISAZIUN DAL TERRITORI

Revisiun parziala „Panas-ch Sura“ – Posiziun

Davo cha la cumünanza d'urna ha fat bun la revisiun parziala da la planisaziun cumünala a "Panas-ch Sura" es la documainta gnüd'inoltrada per l'approvaziun tras la regenza. L'uffizi per il svilup dal territori dal Grischun sco istanza preparatorica pel decret da la regenza ha examinà la documainta ed ha comunicà, as basond eir sülla posiziun inoltrada da la Pro Natura e dal WWF, tschertas resalvas a regard la zona da mansteranza a "Panas-ch Sura" e tschertas pretaisas a regard la recultivaziun da l'implant d'explotaziun. Il cumün sco eir l'Uina SA sco concessiunara da l'implant d'explotaziun a "Panas-ch Sura" han l'ocasiun d'inoltrar lur posiziun illa fatschenda. Il capo, la cusgliera ed ils cusgliers han tut cogniziun da la formulaziun da la posiziun dal cumün ed han decis da tilla preschantar sco basa da discussiun a la sezzüda cumünaivla culs rapreschantants da l'Uina SA.

109 800

ALPS E PAS-CHS

Società da chavras – Dumonda per alpagnar chavras d'utrò

Sün dumonda da la società da chavras da pudair alpagnar chavras d'utrò aint in Val Lavèr i'l rom dals ultims ons decida il Cussagl cumünal da conceder il permiss.

110 800

ALPS E PAS-CHS

M. e J. Mader – Dumonda per retrar l'aua da la lingia dals bügls da Mariers

Ils conjugals Mina e Jürg Mader han inoltrà la dumonda da pudair retrar l'aua per lur chamonna sù Mariers da la lingia dals bügls da Mariers. Il Cussagl cumünal decida da conceder il permiss per tachar sün agens cuosts üna lingia cun ün T vi da la lingia existenta. Las cundiziuns a regard drets e dovairs vegnan definadas in üna cunvegna tanter il cumün ed ils possessurs da la chamonna da Mariers.

Il cumün inchascha üna taxa da trattamaint da fr. 100.--

111

ORIENTAZIUNS

Radunanza generala da l'Uniun dals Grischs (UdG)

La scheffa da cultura rapporta davart la radunanza generala da l'UdG dals 14 avrigl 2012. Tanter oter saja gnü criticada suot la tractanda "varia" la posizun na neutrala da la Lia Rumantscha in connex cul Rumantsch Grischun. Implü orientescha la scheffa da cultura chi's chatta uossa suot www.udg.ch la pagina nouva d'internet da l'UdG.

Radunanza generala da la "Chüra d'uffants"

La scheffa pel baineser social rapporta davart la radunanza generala da la "Chüra d'uffants" dals 17 avrigl 2012. Dürant l'on 2011 s'ha fuormada üna nouva suprastanza chi vain uossa presidiada da Fadri Mosca davò cha Maja Bischoff ha obtgnü il presidi d'urant desch ons. In connex cul rendaquint chi muossa generalmaing cifras allegraivlas esa gnü comunicà cha la canorta survain aint il terz on da sia existenza be amo üna part dal sustegn chantunal uschè chi vain previs per la canorta ün deficit da fr. 15'000.--. Tenor il preventiv es la contribuziun dal cumün da Sent per la "Chüra d'uffants" büdschetada cun 11'300.--.

Traget Fenga-Sesvenna

Il capo rapporta d'üna sezzüda a regard ils progets da l'Interreg e declera cha'l proget per la sanaziun dal Quar nu vegna plü co facil acceptà sco proget d'Interreg, ma ch'el saja in trattativas per chattar otras soluziuns da finanziaziun.

Infrastructura Pozzet

Per evitar cha la planisaziun per ün'eventuala zona da mansteranza a Pozzet vegna difficultada tras il traget da la lingia electrica dal proget da l'amegliaziun per l'electrificaziun da la stalla da Not ed Anna Barbla Buchli, ha il schef d'energia giavüschà cha'l büro d'indschegners chi maina il proget calculescha ils cuosts implü per ün traget plü cunvgnavel da la lingia chi maina da la stalla fin giò Pozzet.

Sauaziun

Il schef da paura orientescha cha'l sistem per la filtraziun previs giò la Centrala da Pradella possa our da plüs motivs gnir installa pür d'utuon. La sauaziun vain tutta in funcziun als 30 avrigl 2012 sainza sistem da filtraziun. Tenor üna cunvegna vegnan eventuels dons chaschunats tras l'aua na filtrada surtuts surtuts da l'Arge Sauaziun Sent.

L'actuara: